

雪橋詩話初集

十

一

二

三

四

五

六

七

八

九

十

十一

十二

十三

十四

十五

雪橋詩話卷第十

遼陽楊鍾羲撰集

吳興劉承幹參校

黔西李漢三世傑以巡檢至本兵謚恭勤廣順劉松齋
清以拔貢官總戎松桃楊誠邨芳以員吏取通侯世稱
黔中三畸男松齋乾隆丁酉拔貢生四庫館議敘得縣
丞初至蜀攝大竹縣丞民有訟債者賒貸家獻金賂公
求不直子錢家公計其數抵所負之半陽許之升堂出
金斥賒貸家曰汝賄官何如償債今更出其半以完母
而令子錢家讓其子立予判結兩造各感泣補冕甯縣

丞遷南充知縣署東鄉廣元等縣事得民心撫民及士卒皆以兒子畜之川楚教匪起以鄉兵破賊大小近百戰賊首王三槐聽公諭降而總統以生擒入告廷訊時三槐供言四川好官惟劉青天一人羅思舉者東鄉人橫行川楚境有年公以計縛之奇其才釋爲鄉勇首思舉遂以軍功起家至提督諡壯勇嘉慶十年由四川按察使入覲

仁宗賜詩有曰循吏清名遠邇傳蜀民何幸見青天誠心到處能和眾本性生來不愛錢遷山西布政使以巡撫事迂欽使初彭齡意彭齡旋署巡撫劾公無威儀失

大臣體公亦自劾才不勝責授刑部員外郎十七年轉
山東鹽運使山東鹽政疲公不受陋規清其積弊商人
紆而課以中程逾年教匪朱成良陷定陶曹縣請於巡
撫同興以官兵五百敗之於方山復定陶又敗之於張
家廟扈家集復曹縣河南賊自滑縣奔曹縣者並殲之
升雲南布政使旋以二品頂帶仍留鹽運使任宋于廷
贈松齋二十四韻云盛世資賢傑通儒善將兵一心能
運用百戰有聲名夫子當官早人間德望并貔貅歸化
育閭闔鑒精誠蜀道昔多壘戎州列重營烽煙愁上帥
耳目俟前旌大勇元無敵深仁更有情近民通疾苦入

世息紛爭短策收龍豹長驅竄鼯狔奇功身不有殊遇
眾皆驚駭歷經中外艱危仗老成犬牙連繡錯鼠竊小
縱橫電掃虛危野風堅齊魯城廉頗才獨任隨會讓諸
卿到處如雲蜺歸來視父兄三軍解犀甲千里靜鼉更
聖主從民欲良臣信國楨崇勛班品貴優秩筴鹽征
借寇心俱慰依劉願共傾奔馳方道路瞻仰得平生岱
嶽眾山小黃河帶水縈偉人真一化下士欲長鳴劍字
光猶在琴聲動未平乘時多感激何敢計歸耕公軍中
久厭苛禮復定陶時專將有功亦不能無中於上官之
忌二十一年乞病不許回籍病愈改授登州鎮總兵蓬

萊閣爲觀海最佳處歲久不葺撤而新之二十五年調
曹州鎮總兵道光元年與巡撫議裁兵事不合部如公
議遂以年老乞休七年卒年八十有六四川山東曹州
立生祠百姓無有道公官爵者皆曰劉青天祠紀其事
者梅伯言魏默深蔣子瀟而子瀟爲詳甯州劉寄菴以
壬辰進士仕山東亦有劉青天之稱

吳聖徵祭酒詩規漁洋詞學樊榭己酉庚戌間館章佳
文成公第中韶九尚書實從受業工詩能書長短句亦
承其指授瑤花獨坐紫藤花下月色低迷清光自來賦
此遣興云櫻穿珞纈高架暮霞浸一壺寒碧滿身清影

玲瓏甚飾透衣香幾疊輕寒約住纔留得而今春色訝
石家步障張空翻起流雲疑活淒涼轉憶前游是那曲
闌干春最佳絕十年花夢應不識禁得等閒蜂蝶心情
正苦更何處悠揚孤笛怕者番吹徹陽關驚舞翠虬香
雪尙書三歲而孤母那拉氏勵節教忠己酉館選嘉慶
己未正月卽以侍郎掌院癸亥由廣東奉使過浙阮文
達贈詩有云使君旌節駐杭州民說公孫尙黑頭時甫
四十歲夏玉延壽穀人先生詞所謂昔日門生已有雙
旌三組者也遇事有執持於權要人無所屈屢起屢躓
癸酉滅滑縣賊賞三等子爵道光七年張格爾之役繪

像紫光閣十三年卒謚文毅

曾賓谷詠山燒云層巒從此瘦春草幾時生望岱云須
知天下雨還望一山雲均有寄託嘗選刻江右八家詩
及朋舊遺詩江右詩徵

三禮鄭注以士禮居重刻嘉靖本周禮嚴州本儀禮及
張古餘校刻撫州本禮記爲最精古餘山西陽城人乾
隆乙未進士歷官高安知縣銅鼓營同知攝九江撫州
南安饒州府事嘉慶五年改官江蘇後復補吉安知府
調南昌宋于廷詩福地琅環記有痕西來零落此專門
十年話舊江南北兩世論交情弟昆洪州別古餘太守

作也道光元年擢雲南鹽法道以病致仕在南昌日所屬武甯縣有婦與二人私而殺其夫前政以夫死途中非由婦姦古餘復鞫之詞無異死者之子年十三矣獨哭而不言古餘疑之請留前政會鞫遂得婦與二人謀殺移尸他所狀案乃定其精于吏事如此

西蜀人
遠皋中丞文幹初名文甯乾隆甲辰進士熟精選理詩文具有法度由詞垣歷卿貳掌封圻正色立朝性不諧俗撫豫時爲忌者所中落職道光初元以副都統銜授駐藏大臣卒于官赴藏時有紀程詩鈔冷磧作云山勢週四圍溪喧繞其麓環山一徑窄沿溪數往復臨崖猿

欲眩赴壑蛇驚伏俯仰隨凸凹向背異溫肅時逢負販
者茗芽壓筠篔採樵三兩輩柴擔雜松竹問客獨何爲
勞形遠馳逐郵亭依冷磧小憩午茶熟檻外素屏張冰
巖挂雪瀑適來所歷境崎嶇猶在目已知行路難且作
畫中讀春堆道中云曉行月未落西巖隱半魄霜重馬
蹏輕蹴踏巖際石泉幽谷口迸徑曲山骨折崎嶇犖确
間鑿空乘其隙容足路一線賊心壑千尺攬轡紆徐行
敢云縱所適向午下巖腳平溪湛秋碧草帳臨水湄波
光照倦客拾柴煮邛茶小憩塵勞蹟嘗爲清鎮張健齋
學正德巽撰表墓之文健齋爲曉瞻中丞日最尊人遠

皋隨仕於黔從游最久督學江蘇取竹汀詹事孫鄭鄉
學博爲選拔沈西雖則視浙江學所激賞者也

畿輔詩人如大名成過村主事城西村舍詩云抱郭長
河曲沿流老屋低垂楊千木合好鳥百般啼牧笛煙中
遠漁簪雨外齊爲農吾願畢卽此稱幽栖河湄宜淺夏
雨過綠生波樓上收帆影窗間倚棹歌風萍穿鴨陣煙
柳度鶯梭向晚此隄上披襟逸興多短垣圍薜荔經日
獨扃扉風徑榴花落茆堂燕子飛詩聊紀時事弈不動
心機信腳華胥路茶香醒夕暉有田皆繞舍一姓自成
村飢雀啄場噪羣兒浴水喧離離桑椹熟灑灑黍醅渾

泥飲皆農父柴門初月昏過村弟南陸大令題畫云凌
霄喬木飽風霜翠篠娟娟弄影長添築杉皮兩間屋煮
茶聽雪坐焚香邯鄲趙秋水布衣三月晦日社集作詩
云 熱將移夏真憐旦暮春隔年相別日白髮暫歸人
逝水看時序飛花逐旅塵終當隨竹杖來往釣魚津昌
黎禪伏山人林退思還家云萬里從軍路還家記舊過
太平經見少奇險歷來多匹馬黃茅嶺扁舟紫帶河丈
夫能不死談笑出兵戈摘句如元城黃吉羽沈子遷園
亭云疏泉深鑿影疊石峭生雲雞澤殷仲子云長懷天
下計猶作布衣人天津湯熙載學博云烏棲甯棟樹松

老不知年涿州楊叔冰大令西郊訪友云白蘋在渚雁
晨去黃葉滿山僧晚歸天津梅樹君孝廉西沽卽景云
秋約黃花來蟹市人隨紅葉上漁船皆如斷澗流泉疏
花獨笑

章實齋典籍賦稟瘠弱少從童子塾日誦百餘言常形
亟亟其尊人顧而憐之從不責以課程然性耽墳籍塾
課稍暇輒取子史等書日夕披覽從山陰劉文蔚豹君
童鈺二樹游習聞鼗山南雷之說言明季黨禍緣起及
唐魯二王本末往往出於正史之外自游朱竹君之門
得徧覽羣書所著文史通義於古今學術淵源輒能條

別而得其宗旨其論詩話謂考之經傳如云爲此詩者其知道乎又云未之思也何遠之有此論詩而及事也又如吉甫作誦穆如清風其詩孔碩其風肆好此論詩而及辭也事有是非辭有工拙觸類旁通啟發實多詩品之於論詩探源經籍所推流別亦有不甚可曉處蓋古書多亡難以取證自孟棗本事詩出本詩小序使人知國史敘詩之意而好事者踵而廣之則詩話而通於史部之傳記矣間或詮釋名物則詩話而通於經部之小學矣或泛述聞見則詩話而通於子部之雜家矣雖書旨不一其端而大略不出論辭論事推作者之志期

於詩教有益而已前人詩話之弊不過失是非好惡之
公今人詩話之弊乃至爲世道人心之害將醉天下之
聰明才智而網人於禽獸之域世之男子有小慧而無
學識女子解文墨而闇文教者皆以傳奇之才子佳人
爲古之人古之人也今之爲詩話者又卽有小慧而無
學識者也有小慧而無學識矣濟以心術之傾邪斯爲
小人而無忌憚矣何所不至哉其言實有所指所爲婦
學一篇持論尤偉皆文學士所當膺服質齋乾隆戊戌
進士卒於嘉慶辛酉其他述作有湖北通志檢存稿並

文集劄記等書

宜城東北二十里有宋玉墓應城程拳時學博大中詩
云寂寞蘭臺宅荒涼託舊墟朝雲端有屬宿草已無餘
秋氣詞臣老山神譎諫疏擬騷吾特嬾空復讀遺書木
香村云楊柳毵毵拂野塘春風不斷舊時香詞人一瓣
清如許怪爾支離對酉陽村亦屬宜城

太湖趙介山殿撰文楷偕李墨莊舍人奉使冊封琉球
道出浙江阮文達以詩送之云狀元風度今莊叔才子
神仙舊鄴侯介山通籍時和相欲使爲弟子適廣東學
政缺出曰一甲三人誰來吾門卽以此與之介山及汪
巽泉帥仙舟皆不往

甘泉黃文暘秋坪有掃垢山房詩集曾館闕里孔氏治
山上公慶鎔及其弟慶鑾從授經焉觀公府所藏先世
衣冠謂唐宋以來百官服色皆準散官孔氏在唐宋時
爵錫公侯而散官未有過四品者至前明始登一品譜
牒所載與見於金石文字者一一可證今攷所藏者皆
前明一品之制也作歌紀之云詩禮堂開朝日旭文楷
靈著香馥馥廣庭陳列古衣冠冠鏤黃金帶琢玉冠上
金絲分八梁繡草五段留春香貂蟬想見籠中護五折
四柱何輝煌配此冠者有禮服青飾領綵儀肅穆白紗
中單赤羅衣一色羅裳裁七幅開篋明明辨等威垂紳

搢笏想風徽紫綬赤紋黃間綠白雀軒軒雲四圍別有
紵囊藏佩玉佩分左右青組束璜瑑瑪琚貫玉珠丁當
應節衝牙觸另裁公服繡緋袍大獨科花織手高盤領
右衽袖三尺籠頭紗帽帶圍腰紗帽齊紗兩展角一尺
二寸雙嶽嶽匣如帽製漆斷紋護持有如石蘊璞便服
猶留忠靖冠世廟頒制師元端冠頂正方三樑起兩山
後列金緣寬元端服染深青色織金製補爲衣飾或仿
深衣素帶垂私室委蛇歌退食我聞服色準散官自唐
迄明制不刊孔氏世世守林廟階級可以証衣冠前明
太祖崇木鐸不列散官重公爵四十襲衣皆上公金繡

龍文何顯爍況有朝衣惹御煙牙笏牙牌辨紀年或紀
正德或天啟大書特書字深鐫又聞景泰光文治玉帶
麟袍始拜賜袍織金花帶一圍今日明明列篋笥一衣
獨異裁紅紵穿袖禿襟金織組此衣元朝名只孫五百
年前制已古篋底鞞鞋製特奇五彩裂帛光離離鞞尖
似欲便鞍馬不敢強解姑存疑

旌德江國屏上舍爲余仲林江叔澣弟子得師傅於紅
豆惠氏善漢學不喜唐宋文每酒後耳熱自言文無八
家氣五十歲筮易得坎之節因自號節甫所刊雜著數
種而外有樂縣考二卷扁舟載酒詞一卷其題阮梅叔

鴛湖秋汎圖云澹澹波光滿日秋釣鼇磯下客生愁菱
塘傍晚花纔放漁舍初晴網未收兩岸桑麻開尺幅一
樓煙雨入扁舟當年曾譜鴛鴦曲載酒江湖憶舊游阜
甯李濱石孝廉鍾泗深於左氏春秋撰規規過一書抑
劉伸杜嘗從國屏問喪禮重游靈谷寺云白下知名寺
遺蹤此再經齊梁空石色風雨挾山靈樹落庭陰暗燈
懸佛界青殘僧有鐘磬愁思入幽冥儀徵汪芝泉上舍
光曦爲韓懷部郎子嘗著蕙稗釋及辨惠氏易爻辰圖
之誤有薪船稀川米來二首得香山秦中吟遺意膠州
王蜀子上舍夏邃於經漢學師承記稱其釋稷一篇穿

穴經傳義明詞達可謂通人喜爲詩與高密詩人李少鶴兄弟友善皆樸學而兼擅詩事者也他若秦州陳曙峰以通郭太史算法薦

聖祖嘗賜熱河夜光木奉敕賦夜光木詩著有春秋長歷春秋世族譜春秋戰國異詞秀水萬循初著有轉注緒言漢音存正遂初堂類音辨所爲柘坡居士集卓然可傳元和汪竹香究心經義及六書之學而與余仲林薛香聞結詩社于城東宋于廷素所嚴事其懷人詩云陋巷汪夫子深居盡典墳三年曾著錄一卷識奇文講畫歸家法門牆孰張軍近爲臨碩難此義幾時聞賈稻

孫開揚州經學之先善爲詩所著凡三千篇鍾鼓崖明
經保精攷訂兼擅詞章著有考古錄桐城馬魯陳爲姚
昔抱之甥毛鄭詩左傳穀梁周禮許書皆有論著其崇
鄭堂詩亦復斐亶仁和朱朗齋精六書通史學有碧溪
草堂稿涇縣胡墨莊毛詩儀禮卓然經師有求是堂詩
廿二卷鈕匪石深於六書爲騎省諍友詩文亦清峭拔
俗甘泉江松泉撰尙書私學工於詠物海鹽吳侃叔邃
於尙書旁及金石嘗撰澉浦詩話歸安嚴九能楊傳九
經史之外詞章之學無不淹貫通經著述之才何嘗不
能以詩自見哉

嚴冬友侍讀早慧李穆堂典試江南欲見之因介熊編
修本往謁李隨舉子夏二字令對卽應聲曰亥唐直經
呪館更正繙繹名義蒙古源流諸書於蒙古託忒唐古
忒文字一見便能通曉歸求草堂藏金石文字三千卷
子觀能讀父書搜攷湖北金石爲之題詠又著有江甯
金石記爲孫淵如校輯寰宇訪碑錄淵如序其湖北金
石詩云始畢督部鎮楚方檄訪各路金石拓本一上內
廷三通館一以副本爲之攷證如歐趙所撰書任其事
者子進與馬通守紹基也子進旣以此詩上督部契賞
其清雅屬爲開雕以備一方文獻旣而督部奄逝楚中

多故金石書卒以不成此邦金鐘鐵鑊豐碑古碣獨賴
子進詩以傳一二子始與子進尊甫侍讀君及張舍人
塤錢刺史沾依畢中丞於關中節署訪求古刻中丞手
著關中金石記刊行於世其後移節中州又成金石書
如在關中時子進亦省謁尊甫作入洛之游已而予官
京師侍讀捐館舍諸同人亦多星散中丞往來節制齊
楚不獨舊游不可復預著述之事亦漸零落及子進來
東訪予於沛上巡使署越十餘年懷人傷逝益不勝慨
焉子進此詩後列入靈石楊氏叢書近人纂有湖北金
石志十四卷較爲賅備有刻本所載唐將仕郎張敬之

墓誌銘云年十一中書舍人王德本聞其俊材當時有制舉天下奇佚召與相見賦城上烏勒歸飛二字仍遣七步成篇君借書於手不盈跬息其詩曰靈臺自可依爰止竟何歸祇由城上冷故向日輪飛王公嗟味乃推爲舉首亦可供幼慧之典故也

山陰章逢之孝廉宗源以對策博瞻發科撰有隋書經籍攷證時京師廣慧寺僧明心開堂說法誑人以符錄降鬼僊挾而書凡言禍福又賄客僕從刺探隱事面發之示神驗京朝官之佞佛者大爲扇惑爭饋貽之僧益豪橫或占人墳塋作廟基或權子母取重利事敗僧以

罪遣歸南中逢之牽連罷斥不能復與會試猶信之持
長齋終身然好學之志不衰性恬憺不肯干謁亦異乎
世之所謂禪鑽者年未五十疾卒於京邸明心潛出游
齊魯間就大吏之不潔者網賄遺返初服易姓名曰王
樹槐捐職丞倅出入詭祕甚後爲襄陽知府知者呼爲
王和尚未幾被劾治罪曩時皈依及知而不舉者皆爲
註誤孫淵如因京朝官惑於妖僧者眾著三教論以曉
譬之大吏某曾倚上官勢屬去其文不得逢之亦寓書
以爲言淵如戲云君以生平輯錄書付我卽去此文君
必祕愛不忍割則是色空之說不足恃也淵如之論曰

佛經最古者則有四十二章經漢攝摩騰所譯後漢襄楷有云浮屠不三宿桑下不欲久生恩愛天神遺以好女浮屠曰此但革囊盛血其語皆出此經知其書是漢人傳本其第一章云凡人事天地鬼神不如孝其二親二親最神也今俗本或削其語若以攝摩騰所譯之經擬之康成箋注或有微言大義其餘釋典僅比於唐宋人之注儒書而世人顧以素食誦經猥云佛法在是何異執應舉之文以求周公孔子之道乎宋于廷讀史十首之一云還俗湯沐事孰儕工詩賈島韻難諧可憐銅寺荒涼後漫說金城寄託乖名賊已迷三里霧羣公終

誤入關齋一朝投畀原如此愁殺張綱道上豺卽詠王
樹槐事

承德孫葆年中丞日秉起家州縣乾隆甲寅擢山東布
政使時致齋相國柄政以威權檢攝外臺大僚自道府
以上皆以貨賂固名位公獨不與通謁曰吾以樸誠受
主知不知其他嘉慶紀元 詔舉孝廉方正致齋意不
欲舉大吏多附和不爲申報公以爲國家異數不當探
朝貴意壅於上聞使野有遺賢在山左江南所舉皆寒
素有名之士次子馮翼以蔭生通判官郎中嘗刻問經
堂叢書孫季仇爲中丞題桂林授經圖云誰似吾宗能

濟美三蘇名重又斜川

江都秦敦夫編修博覽多藏書壯年引疴優游林下者
三四十年構藏書之屋曰五笥僊館禹鴻臚爲汪蛟門
所作少壯三好圖在其家三好謂音律書酒梁蕭琛獻
瑜語也其西湖句云間將錢趁袁韶酒更覓魚嘗宋嫂
羹子玉笙刻其遺集序書之文爲多

慈谿鄭書常徵士爲寒邨老人孫嘗取竹垞詩別久重
逢轉傾倒之語作二老重逢圖又以寒邨所遺二硯名
其居曰二硯窩寒邨曾孫甲字孳新精算學早卒

阮文達在山左蓮有一蒂四花者在浙江學署蘭有並

蒂及一蒂四花者嘉慶己未爲司農借居衍聖公賜第
偶於小院種蕉數本不閱月發一花綠苞倒垂甘露盈
萼招同人相與賦詩時湘圃老人方就養在京屬劉蒙
谷爲作三花圖自爲文記之張皋文詩云草木有殊理
能爲君子容紫芝懷商皓帶草依鄭公吾師專釣和毓
物如春風舉萋旣盈畝樹杜亦千叢眾芳發其英三花
動昭融清心與蓮靜馨德比蘭崇甘露名最佳澤物彰
元功娜嬛有老仙佩蓮紉蘅藟持以引曼壽爲樂無終
窮又作蕉花賦見茗柯文三編皋文少孤貧懇苦力學
從修撰歛金輔之問故博通經訓爲古文詞合揚班韓

柳爲一手文達以爲己未進士第一人文達撫浙皋文
寓書致規略云惠言嘗竊以爲在上者之用人也如良
醫之蓄百藥焉自紫芝人稜丹砂石乳以至柴胡桔梗
烏頭鉤吻莫不備具故一旦有所用取之籠中而不匱
焉者其求豫也雖然其取之也則有間矣其用之也則
又有分矣用人者亦然跡弛之士貪詐之才任之以濟
事殆有所不得已也今夫子既能制烏頭鉤吻而用之
矣則其無所遺于紫芝人稜丹砂石乳決也浙東西之
廣士大夫之都夫子不亦得其人乎毋亦有伏匿深巖
幽谷而不得接于籠中者乎易曰羸豕孚蹢躅言豕之

孚以其羸而未嘗忘躡蹠也昔寇萊公薦丁謂于李文靖文靖曰才則才矣如斯人者可使之在人上乎萊公曰相公終能抑之使在人下乎文靖曰他日思吾言也司馬溫公欲罷免役刻期五日當時范忠宣蘇文忠皆以爲難而蔡京獨如約開封畿縣無違者溫公喜曰奉法當如此然卒亂宋者京也夫使謂與京長爲文靖溫公用雖終其身爲君子可也然用之者不能皆文靖溫公而謂與京之才又自不可遏抑此如以柴胡桔梗制烏頭鉤吻欲其毒之不發也難矣故良醫務蓄珍藥君子務樹善人文達心納其言于其卒也裝之成冊嘗爲

刊其周易虞氏義虞氏消息儀禮圖傳其學者董士錫
晉卿

阮文達烹園葵詩不因考古甯嘗此欲問黟山辨穀農
謂程易疇徵君易疇通藝錄中九穀考辨別禾黍稷三
種最爲精悉於麥豆麻三穀亦多闕略邵氏爾雅正義
猶沿舊說以粢稷眾秠爲今之小米以秬黑黍爲今之
高粱易疇嘗言二雲釋草中言黍稷與前人相反其誤
顯然邵疏有駁難亦不以程說爲然程邵同時通儒而
所見各異劉楚楨原本程書作爲釋穀四卷其釋蜀黍
戎菽胡豆胡麻之類謂凡物之大者皆得稱蜀稱戎稱

胡而鬪齊侯獻戎菽張騫得胡麻之謬說丁壽昌卽其
說而引申之謂凡物之大者曰王曰蜀曰戎曰胡曰牛
曰馬曰龍曰虎曰鴻物之小者曰童曰妾曰婢曰荆曰
楚曰鹿曰羊曰兔曰黍曰燕曰雀釋穀中之虎豆馬豆
皆豆之大者也燕麥雀麥皆麥之小者也以爾雅經注
證之甚確李純客先生謂通藝錄中所言喪服及戈劍
戟等攷多不足信其辨棟宇尤謬有文論之所爲筆勢
小記頻羅菴稱其最精爲發前人所未發易疇書法出
入晉唐故論書有獨到也嘗以丙午游盤山有游記晚
稱讓堂老人文達重葺孤山第一樓易疇有句云髦及

每驚開八袞坐隅也許上方舟

乾隆己酉嘉善錢撫棠少宰充江西副考官成哲親王
送以詩云畫船插幟動江光知有文星入豫章白屋棲
遲思孺子玉堂風采出歐陽閣翔朱鳥詩無敵櫓背黃
花酒可嘗注目唯應秋實在肯教人道進姚黃時倬直
尙書房

睿皇帝方在潛邸亦製詩以寵其行起家文學而風裁
峻整有經世略嘉慶己未督學江蘇途過袁浦見行船
有大書內廷南府者抗疏劾姦吏詭託累聖明時方詔
卻四方貢獻得奏嘉歎飭諸關津禁絕嚴罪所司十三

年陳疾回里林清之變趨詣闕廷歸至德州遇盜蒙馳
諭慰問乙亥以疾終于家

臺灣林爽文之亂陳左海時年十八有海外紀事詩嘉
勇貝子平臺凱旋其參軍郭某卽左海母之族叔屬代
撰上嘉勇百韻詩并序沈博絕麗其序今刊集中張皋
文讀之曰擬之燕許何多讓焉四十歸田好漢學治經
知師法遇鄉黨利病有所見聞必言於大吏雖嫌疑不
避慕武夷山水紫陽精舍晚年自號隱屏作隱屏山人
傳疾時不穀食卻醫藥惟日啜武夷巖茗噉柑柚少許
枕上作絕句云夢想仙巒二隱屏問天應著少微星人

間無此溪山好便欲乘雲上幔亭子樸園明府傳其經
學

歸安沈琨訪西好爲詩有小筠樓詩集十六卷由軍機
中書選佛山同知服闋仍在軍機行走改官御史值

仁宗親政言路大開刺舉無所避嘗請令司道大員毋
得藉軍興奪情各省倉庫虧缺不宜責令見任彌補時
教匪方熾將詣盛京謁陵上言請展期從之及嘉慶季
年松文清乃以阻東巡獲罪較之初政殊不侔矣

乾隆間有蔡永清者兩湖總督陳輝祖家奴擁厚貲居
輦下以財市名號稱善人後復以助賑請優敘旨加五

品銜出入輿馬揖讓公卿間雲南谷西阿給諫疏劾其
僭越句通朝貴自大學士慶文恪尙書朱文正以下多
所指斥有旨卽命會鞫而責問文正及諸大臣明白
回奏旣得實奏革永清職銜西阿坐參奏失實降補歸
主揚州孝廉堂垂十年在揚嘗選刻大儒詩鈔包安吳
爲作家傳稱其學以自守爲本有用爲宗詩文多散佚
性耽作書出入於平原眉山而得其渾逸稿草不經意
者爲尤工

元和陳稽亭在工部日與棲霞牟松巖昌裕陽山鄭貫
亭士超有三君子之稱松巖庚戌進士入臺後屢上封

事嘗言事例數開於國計實無益欲求足用必自節儉
始其卒也稽亭銘其墓貫亭乙卯進士在部十年遷御
史時廣東盜賊未靖疏陳弭盜之本三千餘言稽亭丙
辰進士善爲古文辭熟悉史事而於前明治亂得失尤
留意嘗仿李燾體例成明紀一書在京寓海波寺街門
巷蕭然僅蔽風雨居平不肯受一無名錢惟以教授生
徒自給爲額外主事者十數年不得志浩然而歸以嘉
慶十六年卒宋于廷贈陳大令醕詩舊里論文社窮塗
結客心相逢仍薄宦持贈有狂吟日角書行薦霜華鬢
漸侵儻過海波寺同此悵人琴謂稽亭也

馮魚山論詩謂詩者心聲也高下抗墜暉緩嘒殺各有一偏惟天地之中聲流於人心而發於詩有中聲必有元氣詩者元氣所爲非一切區區格調之謂能如元氣之鼓萬物此之謂大家乾隆庚寅二月翁正三合浦道中與魚山詩謂馮生執虞文靖詩來問語多契微予與粵士論詩七年所未見也是年陸健男典試廣東魚山出其門戊戌成進士由編修大考改主事書法由褚入大令尤精研蘭亭生平徧游五嶽皆造顛題其崖壁其繪事亦不學而能覺羅文敏公桂芳其受業弟子

黎二樵讀翁學士所輯黃仲則詩集云平生最高名通

籍極卑官然且不可兼使汝歲易殫甯知東方士岸絕
十年冠搔首天西北佳人渺雲端手翦雲作花風翻花
作瀾偶隨絮沾泥遊戲下人間忽爾亦爲人卅年如弄
丸不知我生死安憶我憂患獨往以獨來誰待將誰歡
或言君尼才僅得樵與班君才撻萬象樵也小黠頑類
感儻雲龍天授殊易艱心氣可遙通期我乎道山小技
何足道大化方就閑騎控朱方鶴帔披丹穴鸞洪稚存
謂劉松嵐所刊悔存齋詩爲翁學士所刪凡稍涉綺語
及飲酒諸詩皆不錄存有檢點溪山餘笠屐刪除花月
少精神之句其持論不同如此二樵字簡民自稱樵夫

又號石鼎道士擅詩書畫三絕同時有張黃黎呂之稱
張謂順德張葑房呂謂番禺呂石颿黃謂順德黃舟書
年瘦生名王臣畫仿雲林嘗寫枯木竹石贈黃煦堂題
一絕云幾度行吟問水濱西風回首總無因年來筆墨
皆拘束只寫溪山嬾畫人家本勤舊僦居邗江惟二三
知己互相盤礴天趣清遠亦倪高士之亞

裘恭簡爲文達次子教匪未靖以太僕寺少卿偕大理
寺少卿窩星額奉使犒軍時經略額勒登保引嫌請止
舉劾麾下功罪公奏請五路帶兵大臣所統將士皆聽
舉劾移書四川總督威勤伯勒保爲陳廉頗藺相如相

下之義兩公大和五路者額勒登保爲一路德楞泰爲
一路勒保爲一路明亮爲一路惠齡爲一路也松文清
序其靜宜室詩集謂可亭天資粹美而倥偬密勿之際
未嘗一日去經史其爲詩沖和蘊蓄抒之有餘余在西
招時可亭寓書云公暇宜多讀書前輯古品節錄曾敘
及之文襄文清皆一時重臣而能受善言如此其風概
自非後賢所及

完顏廷鑑字衡伯號曙墀爲海龍給諫五世孫守溫州
五年奉祖母戴佳夫人喪回旗溫人爲建生祠譜治蹟
臧祠中阮文達書卷首曰去而益詠性澹泊於聲色狗

馬輿服一無所嗜惟篤好客客至留飲連日夜不倦間
爲詩及詞皆清婉可誦娶於常州惲氏世所稱蓉湖夫
人也其生也祖母唐夢老嫗授大珠遂命之曰珠知學
能文辭晚年耽靜養嘗誦田山薑母夫人句云老人自
覺修齋好不爲兒孫講道經與紅蘭主人女縣君最契
工紵繡在泰安時繡五大夫松圖在潁州時繡東園圖
精于繪事受之族姑清於深得甌香館賦色家法繪有
百花手卷金魚紫綬圖春夜讌桃李園圖錦灰堆圖及
紅島護書圖選閨秀詩正始集斷自國朝有以明祁忠
惠公彪佳夫人商景蘭詩集來獻者誦至公自傳千古

吾猶戀一生君臣原大義兒女亦人情附載於其妹小傳中後得黃忠端公道周夫人蔡玉卿詩亦附入莊氏小傳中嘗刻李二曲集遜菴遺書又仿列女傳纂蘭閨寶錄六卷可與完顏女史兌所輯花塚叢談作一佳對兌字悅姑都統穆里瑪室也

江秋史侍御蘇齋作東坡生日詩云丹元昔示青蓮真謂仙其游乃非謫蘇二來還喚謫仙此語曾徵黃魯直鳴騶更起三千秋電注疇能貌芳迹龍隕山人禿筆拈慘淡經營求始得好從星日想精神歷盡冰霜留笠屐異代淵源有替人寶蘇室中瓣香炙臘筵新筍滿甕雲

古鼎細篆老臍柏大荒髣髴披髮來來風軒記穀行宅
弦指疑呼玉澗手妙耳奇聞詎非昔響泉聽徹十三弦
再悟前生房次律鼓琴奉像新稿傳可亞景文松鶴幅
黃子木杖壽卯君生日年年老兄特小詩我愧王郎珠
君本不拈壽金石詩成一笑聞不聞千古峨岷互長碧
秋史博雅嗜古有古泉癖與翁宜泉各出所有如鬥草
交汪容甫所學益進經義詞章靡不綜貫盡閱兩漢石
刻其隸法卓然成家兼能人物花卉中年遽折所撰廣
雅疏未成卒之前一年嘗仿漢碑式作收藏印石高二
寸碑面修三寸濶寸餘上仿碑頭作穿孔刻陽文江君

之記四字下碑文云君諱德量字量殊江都人太守君
之長子也舉進士官御史世精古文金石竹素靡不甄
綜乃于乾隆五十七年霜月之靈刊茲嘉石以傳億載
自跋之云趙邠卿生立圓石達者情也而蕩陰表頌生
亦稱諱至寶難得性命可輕身實殉之墨君弟爲予摹
漢碑獲予心哉秋史識于問津書院學海堂又嘗撫古
布文安陽二字爲印跋之云汝南安陽班固謂爲故江
國應劭謂今江亭是也又作小印瑕邱公族四字跋云
瑕邱公儒林之宗師也與吾涕陽皆嬴姓作此以志仰
止秋史詩文未成集錄之以見一斑

翁覃溪詩風抗南園後魚山又葑房何區五家派莫誤
二樵狂張葑房有逃虛閣集夜發錢塘江口云西子湖
邊感舊游樟亭風起繫扁舟未圓月趁斜陽早欲落潮
如碧漢流山色化煙全入夜客心如雁各禁秋六和塔
火西興樹暫許歸人一散愁葑房善分隸書又能繪事
已酉成進士官翰林未幾卒

上元董文恪公撫皖時張菊溪以粵督過境值海寇方
張銳意滅賊貽文恪詩云嶺南一事君應羨殺賊歸來
啖荔支及寇受撫與菊溪書曰昔蒙贈詩當改一字爲
降賊歸來文敏爲之憮然孫淵如贈詩有一生峻望逢

迎少九曲巖疆節鉞尊之句嘗謂人不可作無益事不可爲無益語不可用無益錢刻於己爲儉儉於人爲刻人知儉與刻之分處世之道過半矣此與趙收菴所云不敢好名爲欺人之事不敢好奇爲欺人之學皆腳踏實地語

惲子居阮郎歸蝴蝶詞傷不遇也左仲甫中丞中乾隆癸卯江南榜癸丑始成進士己酉下第賦榆錢諸闕亦此意滿江紅榆錢和惲簡堂作云滿地清圓不道竟買春無力曾覓徧條條深巷草青煙碧也恨飄零難自主
僅教墮落無人惜與柳絲一樣認前身輕拋擲禁不住

鶯兒舌襯不盡鶻兒血立街心半晌掃開重積風院都
無花一片晴霄空裊絲千尺只幾家燕子語呢喃愁難
說疏影朱藤和簡堂韻云才傷絮落又水邊院角撩亂
心曲宿雨初收斜日低銜平添一架新綠珠簾不捲留
春夢怕飛出葳蕤深閣濃雲壓住鬢釵那管粉痕銷肉
應念鸞箋未寄曉來斂翠黛珠淚盈斛知否年時紫玉
成煙賸有燕飛華屋傷心一樣相思種不及豆紅堪掬
只模糊眼底眉梢挂垂垂千絡暗香青梅云玉人去也
算幾番得共煙寮月榭小夢乍醒已是闌風散初夏休
說冰魂拋遠還戀著空枝未舍放些子酸苦心兒教那

人嘗者牽惹乍堪把歎冷藥暗香不到瑤竚翠圓來乍
休認輕丸浪拋灑都是春風怨魄須珍重前生身價只
這裏偏誤了故園清夜鬢洲漁笛譜僅備詠物一格者
無此苦心慧語仲甫起蹶州縣垂三十年落落自守旣
任方面不六年峻擢至巡撫七十歸田不名一錢其初
赴皖江時題許逗雨冷村煙樹圖云比似出山泉水合
渾流濁浪滾滾東注可也回頭舊日溪山多少白雲紅
樹頗懷冷泉亭水流出西湖之懼其勵節慎身可謂克

踐其言

臨桂朱依真小岑著作甚富兼工詞曲有論詞詩二十

八首謂詞至前明音響殆絕竹垞始復古第嫌其體物
集不免疊架其後六首云剛道霓裳指下聲天風海雨
倏然生不逢郢匠揮斤手楮葉三年刻未成范陸詩名
自一時江南江北鬢成絲遺聲莫遣多騷屑不任空城
曉角吹妙手拈來意匠多雲中真有鳳銜梭讀書未敢
因人廢柰爾天南小吏何雜擬江淹筆有花傲顰不辦
作東家等閒渲出西湖色卻倚傍人寫誰華欲起琅邪
仔細論機鋒拈出付兒孫禾中選體荆溪律一代能扶
大雅輪琴趣言情尙泠音獨將騷雅寫秋林當年姜史
皆迴席辛苦無從覓繡鍼至其前廿二首中於美成有

微詞則偏宕之論也

臨川李松甫刑部秉禮家世以業鹺籍桂林詩學左司以韋名廬公博司空守家法及高密李少鶴憲喬所論

列少鶴兄弟依張爲主客圖例蒐集元和以後近體詩奉張水部賈長江爲主朱慶餘李洞以下分承兩派

名曰重訂嘉慶乙亥以養假棲遲嶺外自治園林日研主客圖

習詩歌與鄧湘皋倡和有樵湖詩略刻行所藏金石文字多名拓嘗得元康里氏本廟堂碑及唐拓化度寺手自鉤摹上石其書法亦於歐虞爲近曾文正謂作字之法可爲師資者時賢一石兩水古法六祖三宗一石謂劉文清兩水謂春湖及程春海也

補山公相交結權貴殞師安南但撤回所封一等謀勇
公及紅寶石頂旋入爲軍機大臣出督四川復賞伯爵
卒謚文靖葬於西湖天馬山之原病中札懇和相請以
孫均襲封並列入正白旗漢軍嘉慶十一年均病廢不
能供職又無親子可以承襲將爵裁撤並出旗檔歸民
籍朱酉生詩云臨平春水漾斜暉三面山光涌翠微故
老尙傳軍府貴孤孫新向羽林歸曾從失律寬殷浩早
爲趨塵誤陸機論定功名慙赤簡當年種樹歎成圍西
生爲吳中後七子之一集中律句如生年早薄嵇延祖
死友終懷范巨卿漢朝郎士收巴肅魯國諸生哭孔融

催科古有陽城拙發粟今無汲黯良危亭孤角山城柳
遠渚霜燈水國楓格律均極雅健臨平一首尤關詩史
瑛夢禪從子宛中孝廉嘗游錢詹事之門詹事贈宛中
詩云之子名家彥風流數妙年譚經探義海搜句出心
田老馬途能識神錐穎最先中郎枕中祕欲待仲宣傳
姚惜抱爲胡雒君題說經圖云孝廉郡國聞推舉吳越
溪山共燕閒圖三人一雒君一錢晦之一陳仲魚仲魚
海甯黃岡里人舉嘉慶元年孝廉方正旋中戊午鄉試
塢上藏書處曰士鄉堂復於硤石西山麓築紫薇講舍
讀書其中吳虞臣過陳簡莊徵君紫薇講舍云背倚蒼

匡閣一間雲山北牖抹煙鬟放翁詩句堪移贈買宅錢
多爲見山新坡舊業本黃岡卷軸丹鉛說士鄉重繼白
公吟眺地紫薇花下讀書堂嘗與錢辛楣翁覃溪段懋
堂質疑問難晚客吳門聞黃蕘圃百宋一廬九經三傳
各藏異本于是欣然定交互攜宋槧元鈔往復易校羅
舉異同著作等身輯有論語古訓阮芸臺爲刻其續唐
書其尊人璘專心訓詁作說文正義未成而歿仲魚卒
業焉固不爲張滄毛居正之學所囿也

澈浦巖樂園廉使年十三應童子試賦西陽懷古田園
雜興各詩爲褚筠心學使廷璋所激賞遂於地理之學

著有苗防洋防三省邊防諸書舉孝廉方正策平定教
匪方略奏對幾萬言

仁廟親擢第一次日傳詣軍機詢屯政以知縣發陝西
其功名遂與南山相終始嘗云燈自游羅慎齋先生門

羅鴻臚

腳跟始站得定並得力一思字辦事才有把握詩

古文辭之學則得之姚雪門

頤

張訥齋

姚

成二學使長沙

周鏐春田與同學守蘇州有政聲嘗爲鐵冶亭校刻人
帖皆端人傑士與李申耆所見帖用意略同

侍郎福勒洪阿由官學生襲一等男嘉慶庚午以侍衛
充伊犁索倫營領隊大臣西南邊外有特穆爾圖淖爾

旁多古翁仲巡邊至其地有詩云斜陽寄語雙翁仲不
是前朝舊鼓笳二十一年山閣學政侍衛作爲葉爾羌
辦事大臣公署卽小和卓木之花園有大池池中造八
面亭有長橋高下曲直可達亭前居室臨水有艇子艤
於水旁開門卽可汎舟其地恆燠爽水長隄花木恆春
垂楊兩岸掩映水碧居其中恍如西湖上游侍郎集唐
人詩句白首卽今行萬里皇恩只許任三年辦事大臣
向多三年
更易爲楹帖屬徐星伯爲之書

康熙間陽城田文端公宰英德建書院立三賢祠唐忠
肅公介洪忠宣公皓鄭監門俠每春秋祀諸生咸來習

禮以禊日會帽子山重九會南山聖壽寺賦詩公既去
邑人立木主祔之曰四賢祠改舊書院曰文端書院其
後寢不振鶴山吳耀園爲訓導復舊觀人多向學嘉慶
辛酉補新會教諭姚秋農學使飭學答先儒後裔於是
切白沙先生適嗣者日至耀園至白沙村見眾耕於隴
因與言白沙故事語及公適派則皆歎息曰微矣祇阿
禮一人貧甚歲以蒙館活耳耀園曰阿禮未聞學使者
訪求先儒適裔乎胡不自陳於學官秀才可得也皆曰
固聞之然有某某者以千金啖學官學官旣許之無能
爲矣耀園笑而去詰旦陰使人召陳禮至年三十許試

以文頗有條理命以譜牒呈果不謬復之學使而陳禮
得游庠意隴中人作無當卮也耀園與饒曼塘馮魚山
溫貧坡陳觀樓同年領鄉薦以知縣就教職有晚香堂
詩集花峰樵唱留香齋詩談張曲江集訂譌觀樓有賜
書堂集阮文達修廣東通志爲總纂於大戴禮記老子
荀卿呂覽淮南諸書皆有攷證爲王石臞所推重

布魯特例至伊犁進馬每年夏秋將軍赴察哈爾厄魯
特游牧查孳生牲畜其馬羣扣限取孳照三年一均齊
之例辦理馬之善走者前肩及脊或有小痂破則出血
土人謂之傷氣凡有此者多健馬故古以爲良馬之徵

非汗如血也後漢書東平憲王蒼傳宛馬一匹血從膊
上小孔中止眾經音義龜茲卽屈支多山龍馬又引左
傳云屈產之乘徐星伯新疆賦所謂獸異種於汗血整
雋乘於屈產

高宗聖製有愛烏罕四駿歌把達山

駿歌上駟有馬

名安俊黃者松文清爲伊犁將軍所

仁宗乘之而良辛未秋幸灤河親射

以白鹿乃賜今名

文清時督兩廣軍姚石甫在幕中作安俊黃歌紀其事

穆宗嘗賜榮全所進馬名曰鐵龍

駟

百菊溪功名烜赫母弟香巖宗伯桂

師獨澹泊自守持

躬清介不事權要乾隆癸丑通籍道光己丑始轉副憲
姚石甫詩所謂三十年來耐官職不知驃騎久騰驤也
有詠懷詩云官如秋水澹人比太倉陳

嘉慶紀元內禪禮成和珅以擁戴自居出入意頗狂傲
復薦其師吳省蘭爲上錄詩草覘動靜朱文正以吏部
尙書協辦大學士召

仁宗作詩寄賀屬稿未竟和珅取以白

上皇曰 嗣皇帝欲市恩於師傅耶 上皇色動顧謂

富陽董文恭曰汝在軍機刑部之日久是于律意云何
文恭叩頭曰聖主無過言 上皇默然良久曰卿大臣

也善爲朕以禮輔導嗣皇帝乃降旨朱珪仍留兩廣總督之任旋又改撫安徽直內廷者無不色變震恐文恭從容書旨而退在綸扉幾二十年臨事鎮定務持大體癸酉秋九月天理教林清李文成等倡亂時車駕幸水蘭歸途謁東陵次白澗行宮猝聞禁城盜警有議欲奉駕之京東調大兵成列而後進者文恭隨扈力言京師根本小醜不足患請速回以定人心上悟卽日回京次煙郊適英煦齋以所統兵焚橫邨及宋家莊董家莊賊穴並禽賊目迎駕還宮三日而定姚石甫詩彭紀書多理未醕先皇命相本知人他年一語回車駕始信

江都社稷臣自注嘉慶初大學士缺時望在彭紀 上
曰彭元瑞紀昀讀書雖多而不明理特命文恭

奚九鐵生詩以畫掩弟子徐鉞西澗亦能詩嘗賦寒夜
書聲云淒涼無母課老大愧人聞

法梧門石倉十二代詩選跋曰四庫全書提要云石倉
歷代詩選五百六卷學佺工詩去取頗有別裁其明詩
分初集次集千頃堂書目尙有三集四集五集六集三
百八十四卷今佚禮邸委校勘者則一千七百四十八
卷較四庫所收多至千餘卷矣古逸詩十三卷唐詩一
百卷拾遺十卷宋詩一百七卷元詩五十卷明初初集

八十六卷次集一百四十卷三集一百卷四集一百三十二卷五集五十二卷六集一百卷七集一百卷八集一百零一卷九集十一冊十集四冊續集十冊再續集九冊三續集五冊三四續集一冊四五續集一冊五續集三冊五六續集一冊南直集八冊浙集八冊閩集八冊社集十冊楚集四冊川集一冊江西集一冊陝西集一冊河南集一冊九集後不分卷以冊代卷其曰三四續四五續五六續義例難通而雕鐫完好刷印清楚自是閩中初搨精本余時方校補新安二吳氏科名書僅錄十九家而止詩之正變升降書之錯雜踳駁未及論

也書歸十日而禮邸有回祿之變此書不可知矣後有輯明代詩者不可不于此書留意故詳著其篇目以待考按禮邸遭回祿在嘉慶十二年鮑雙五侍郎丙夜修書洋洋數千言責以亟宜修復以存國體見嘯亭雜錄鮑雙五性嚴厲嘯亭主人以爲畏友嘗挾優過其寓拒不納伉爽敢言癸酉自湖北學政歸滑縣道梗摩賊壘而過上疏調劑兵食語多采行乙亥條奏武英殿事劾提調劉榮黼不職榮黼撫其平日語中之奉旨傳詢自承妄言近日有旨旗人多靠不住此時督撫多用漢人等語落職雖觸時忌然適足見朝廷用人之公

宣宗御極以編修召對游擢詹事初從吳定澹泉學詩
古文因以溯劉海峰中年後師事惜翁嘗以司空表聖
二十四品排次唐詩

姚石甫詩海內文章有惜翁新城學士得宗風方植之東榭

劉孟塗梅伯言管異之均堪畏翰卻家雞是阿蒙石士

宗伯爲凝齋先生文孫舅氏魯山本古文本朱梅崖復

與姚惜抱善石士受其法且使之師惜抱詩初學蔣莘

畚後亦以惜抱爲法石甫謂石士詩文醕雅得惜翁正

傳然石士殊推管異之比諸六祖而自居秀上座嘗取

近時人言行及關於國故者爲納被錄惜抱次韻答陳

石士二首云懿子垂纓鼓篋年遺經勇紹昔儒傳一登
雲閣親藜火十見春城改禁煙遠夢江湖浮桂檝舊居
池館積苔錢蕭疏華髮鍾陵下鎮有相思望日邊隱矣
何須復著書百年清暇惜三餘劣如老馬知文字敢比
猶龍在物初祕閣待君勤校理荒亭無客問元虛難期
敷衽論心會且託天涯尺素魚

姚惜抱寄朱二亭句云居惟甕牖仍耽酒行過旗亭就
賣漿崑山徐小慙題寓壁云談深新雨渾如舊住久它
鄉已似家錢東生閒中句云善病轉於求藥簡無車那
爲詣人忙避地二年頗得此中三昧

朱白泉觀察朱爾賡額爲海愚運使長子原名友桂入
貲爲郎充滿章京直樞密

高宗雅不欲旗員同漢人命名改今名以漢譯之爲好
古乾隆五十七年督糧江安六十年引疾改京職選戶
部時和相監奴劉全之女夫號檳榔蔣者倚勢奪民產
訟於見審處叱使長跪掌責數十有西賈利旗租地嗾
言者使得與民人通買賣事下部堂司皆被惑獨不肯
下議賈啖以金正色曰旗人居積本微薄又不善治生
若聽與民人買賣旗地不三年旗產且當盡吾顧利賈
人金使二十四旗數十萬戶盡困飢寒耶朱文正時管

邵廉其才守可大受以自告改例不列一等人才可惜
薦授潮州庚午隨百文敏勦捕洋盜張保張鄭氏等頗
樹功績辛未由高廉道調江南鹽巡道因主議增長葦
蕩事故河帥陳鳳翔遣丁京控欽使查訊爲鳳翔熒說
所誤被嚴劾遣戍伊犁二十五年冬賜環白泉性剛毅
多上人於顯要無所屈服勇往敢爲以任事犯眾怨獄
中與百制府朱方伯錫爵二書文筆犀利浩瀚其隨海
愚任四川山東江南老宿如姬傳心餘及吳殿麟皆納
交詩文有所受之也嘗以姬傳訪海愚於泰安時所作
詩文同裝成卷姬傳題云平生交友接龍門霽雪高山

共酒尊立處不知天下小坐中祇謂古人存文章海內
亡知己旌節江東見後昆留得白頭如夢過舊書重展
落唬痕

長吉集中無七言律黃唐堂謂一日讀南園詩第十一
首嫌語氣未完急以次首連讀之始知爲一首而誤分
者詩曰長巒谷口倚嵇家白晝千峰老翠華自履籐鞋
收石蜜手牽苔絮長蕪花松溪黑水新龍卵桂洞生硝
舊馬牙誰遣虞卿裁道帔輕綃一疋染朝霞邗江陳本
禮素材作協律鉤元取其說自序謂集中如李憑箜篌
引銅駝悲北中寒假龍吟崑崙使者等篇皆憤激痛心

而出之者又若春坊正字劍子歌貴公子夜闌曲老夫
采玉歌洛姝眞珠等作咸感切當時目擊心傷託于尋
常咏物寫景不易使人窺其意旨之所在長爪生有知
亦許爲後世子雲否

朱竹垞經義考博稽傳注作述源流最爲賅洽爾雅二
卷外凡形聲訓詁之書闕焉未錄翁覃谿作補正十二
卷又欲廣小學一門謝蘊山中丞其門下士也因輯小
學考五十卷書成於嘉慶戊午版藏於廣陵寓宅道光
戊申焜於火咸豐壬子其孫質卿重爲勘校付版削焉
蘊山所著有西魏書粵西金石略勝朝殉節錄樹經堂

詩文集及詠史詩在浙藩時闢麗澤軒以延賓客移宋
淳祐鐵鑊於軒中作詩紀之覃溪題方蘭士西涯圖寄
蘊山杭州云若問瓣香真意在茶陵北地兩皆非以蘊
山來詩謂公排何李而尊茶陵故有是作公詩於茶陵
如何猶待論定門下如魚山蘊山及吳蘭雪張南山金
手山樂蓮裳尙未有李何一輩人也

吳蘭雪受詩法於蔣茗生自康熙三十二年準琉球國
奏遣其秀士入監以敬一亭西廂爲舍居之別設教習
嘉慶十年蘭雪官國博琉球官生向邦正入監肄業出
其門下聰穎能詩蘭雪後官中書有鳳皇未識池邊樹

桃李先栽海外花之句朝鮮侍郎申緯推爲詩佛吏部
判書金魯敬父子鏤梅花爲龕奉其像並置其詩卷於
仲春集其國勝流置酒爲壽好事者繪圖張之出爲黔
西知州嘗於東山建陽明祠與王惕夫劉芙初陸祁孫
樂蓮裳彭甘亭皆久客題襟館詩如康山草堂歌云康
山一拳石寄託城市間得姓乃以狀元誤盛名遂壓揚
州山當年流竄猶英氣傅粉簪花恣遊戲若果尋秋到
草堂名山便是埋憂地山下危樓倚夕陽風帆葉葉度
雲檣隔江遙見萬峰揖白鷗影盡連空蒼山下不知何
代墓王侯草木今同腐夜半衣冠尙出游神燈吹入青

楓樹吳生年少來揚州第一華筵開此樓燭花萬朶照
狂醉天河倒入銀槎流琵琶仙語復鬼語一曲聽殘淚
如兩人海飄零又十年素心賴有山靈許昨夜秋風隨
雁來主人招我傾新醅桂花三日落成雪飲酒不痛徒
心哀君不見康對山歌且舞救友污名心獨苦烏紗一
擲能千古英雄才子亦黃土碌碌狀元何足數舟中自
訂癸丑甲寅詩卷感懷云年少風懷花正綺天寒離緒
酒初冰瞻園月夜云林塘幽絕似山家臨水闌干臥影
斜仙鶴一雙都睡著冷香吹徧綠梅花雖從蘇齋談詩
初不類其詩派

張秋水高郵弔秦淮海云南湖秋水亂寒煙小庾鄉關
感暮年四海詞名歐柳共蘇門交誼李張前醉回遠道
藤州夢山抹微雲學士篇一樹垂楊枚叔里西風閒拂
酒人船其和阮文達雲臺峰句云雨餘闔苑仙脾重花
亞朱陵地肺通對極工汪漢郊詩不多作爲許念茲題
汀洲采白蘋圖云打槳西亭路繫纜西亭樹煙水自蒼
茫游人幾來度亦復雅近裴王其楊園先生墓表述楊
園之言曰東南壇坫西北干戈其爲亂一也豈知後來
名士卽以壇坫爲干戈又非明季釀亂諸人所及料矣
貞觀廿一年正月九日造像銅碑碑面全塗黃金鑿字

六行小楷極似褚法蘇齋芸臺皆有歌張船山詩云一
莖小草現金身一點微塵轉法輪莫看唐碑三寸許威
光曾照請經人褚虞筆法涌毫端響揚猶難鑿更難同
把須彌藏芥子神功都作化人看靈文宛轉頌彌他貞
觀遙遙字未磨一片妙明金粟影照人十度換山河雙
修福慧此身兼大道原憑信手拈好補龜趺暎螭首蓮
龕重起妙莊嚴

阮文達積得漢晉八瓊題其室曰八瓊吟館賓友聯吟
編爲刻燭集三卷元和蔣徵蔚蔣山分詠後漢竇武印
曰井中玉璽奪月光銅盤折矣天蒼涼桓靈之際代更

嬪無端一印關興亡蟲沙名姓紛無數龜紐至今猶左
顧知是將軍一片心土花蝕損精靈護中官得志黨錮
危大臣何用椒房私批鱗特抹黃門獄想見庭前解綬
時笏霸雖休李杜死明年竟應童謠矣長樂初收北寺
寒此印自然隨指使太白灼爍宮門開刊章中變臣之
蓄五校旣散臣力竭大將軍敗非天哉漢家自此悲無
奈轉眼洛陽城又破火氣銷將國運殘一十八朝彈指
過煌煌手鑄蛟螭文黜澤化作荒郊雲可憐不得此印
力慟哭都亭授首人肘後藏來餘寸組棄置甘心埋故
土漫隨壞鐵到人間恨不親鈐誅節甫摩挲陡覺雙眸

明銀章流落難爲情小物千秋增感喟誰傳賣印是游

平

結語
殊弱

張秋水漢金釭歌云長安二月東風早昭陽舊

苑生春草今人耕作漢人宮拾得金釭色枯槁換來不
惜金叵羅尊前爲作金釭歌摩挲故物看銅狄檢點殘
書話影娥憶昔徵歌初第一趙家姊弟承顏色底須雲
氣畫成楣不羨椒花塗作室雲楣椒室總鉤連宮樣新
翻號列錢光銜白玉釵頭燕彩發紅葩井上蓮此時芳
苴鐙難燼此日綠熊席交映團欒舞後水晶盤鸞環照
罷菱花鏡夜深蛤帳光生寒何止珊瑚閒木難浴回豆
蔻誰同拂鬢罷櫻桃祇獨看合歡殿冷披香歇此釭鑄

後煩珍惜只宜長對掌中杯只道長如天上月一朝訣
別溝水流銀鷺金鳳又成愁珠簾別院應難惜翠羽紅
牆誰見收秋風滿地宮槐落七寶臺空攏魚鑰拋殘鈿
笛井牀閒銷沈銀甲苔花薄銅人辭漢淚如絲海肺鐙
邊不自持太清樓上徒相憶博古圖成那得知教吟外
傳花閒聽班班認得臙支印西京雜記憶吳均祕辛遺
事愁楊慎一規髣髴溫柔鄉較量尺度仙人璫磨蠟自
宜儕粉碓熏香切莫洗桃漿倉琅根斷漢宮閉樊嫵無
言還擁髻黃金不成仙不來釭乎愁說繁華逝畫堂甲
帳盡前期金棗銀蠶又一時莫問曝衣樓上飾西池惟

有燕交飛二詩於兩漢興亡憑弔蒼涼語極沈鬱集中
如平湖朱爲弼右甫錢塘陳文述雲伯會稽顧廷綸鄭
鄉石門方廷瑚鐵珊儀徵許珩楚生南城王聘珍貞吾
濟甯王宗敬禮思吳江程邦憲竹厂吳縣吳廷琛棣華
奉賢陳廷慶古華及陳曼生陳恭甫何夢華皆一時勝
流文達置西漢定陶鼎於焦山媵之以詩考焦孝然嚴
分宜二事謂等諸勿稽致爲精核

姚文僖初名加畚字經田鄉舉後易今名自號秋農晚
營墓田梅漪莊因稱梅漪老人貌清癯長眉修髯髮黑
如漆著有易原春秋日月表說文聲系說文考異古音

諧嘗議南唐徐氏鼎臣音學極疏楚金見義卽衍聲字
少涉意於占驗旁及醫經董蔗林疾

仁廟命診之英煦齋患胸瘍醫皆謂不可理就其家視
之覆奏可瘡乃屑人稜糝所患用刀劑獲安後因頒賞
內府書籍特賜蘇沈方嘗言五代以後人道不至陵夷
者宋儒之力雖爲阮文達己未所取士而倡和甚稀知
其爲學初不以績飾爲務矣莫猶人亦己未庶常多文
而栗於時無所知名至滌生相國表章之始顯

餘堂觀察恆慶一字梅邨爲覺羅恭愨公圖思德子有
從軍詩鈔官湖北糧道時寄示長男桂芳云烽火全銷

解戰袍東歸日夜簿書勞偷閒亦有南樓興愛客空懷
北海豪江上清歌喧雜沓夢中老眼醉醅醕貧寒原是
儒臣事莫羨連雲甲第高自注頌芳來信都中大水橋
居房屋大半傾積不堪棲止
故及文敏忠鯁有古大臣風以嘉慶六年散館是年卽
擢侍講充日講起居注官

仁宗召見曰奇才也因日見信任七年餘堂卒於官十

一年以閣學直上書房尋轉禮部侍郎調戶部家素貧

不名一錢門生有饋納者丁卯典順天鄉試
庚午主江南鄉試公以束脩

贄先生其誼甚古然某任司農尙可充用不敢拜受其

惠因封還之時相祿康以苟且爲政公深惡其人至面

責之曰不意宗臣中有如公之行者真污蠟帶間物矣
祿康銜之次骨然亦無如公何也辛未入直南齋癸酉
九月林清之變參贊樞務一日南齋翰林趙秉冲召見
出云有旨內廷諸臣凡兩月餘先後所頒 御製文七
篇其各書以進公擬稿預以示董文恭董曰公言雖是
恐不能合 上意公曰此何等時尚以迎合爲言耶文
恭爲之動容七篇奏御頗契聖心邵陽文編未之全錄
甲戌命赴廣西查辦成林案行抵武昌暴卒恭愨任湖
廣總督及餘堂觀察先後皆歿楚中

仁宗賦詩志悼有直爽無偏英賢難得之語並以三世

皆隕於湖北爲定數云文敏學有本原才筆豐贍早登
九列又獲主知可以弼成文治而樞府新參輔星早
殞其敬儀堂經進文稿詩稿敬儀堂詩存世亦鮮留意
者卽以文事論所爲七觀一首雖伍堯先生不逮也

林清首亂畿南遣陳爽陳文魁潛結太監閻進喜等闌
入禁門林清先以習教被繫旣釋歸轉益煽亂數年之
間往來糾結於曹衛齊魯之間其黨至數千人闖寺職
官竟有預其謀者而未事之先曾無一人抉發藏利刃
懷白幟度越門闕飲於都市無詞而知者禁兵千計賊
不及百闔門而擊之俄頃可盡乃兩日一夜始悉禽戮

姚石甫感懷詩云往昔騷南楚深宮歲幾勞萬方纔喙
息三輔又旌旄竟落昭陽瓦空環衛士刀安危仗元老
吾輩首重搔又感懷雜詠云翠罕霓旌塞上回雲屯虎
士徧中臺如何紫闥澄心殿忽見青燐戰骨灰衛國神
靈憑 廟社從官詞賦惜鄒枚天書已下眞垂淚白首
何人濟世材都城迢遞密雲東輦路蒼茫積氣通一道
灤河盤上谷八屯騎士接離宮黃旗走馬猶天外赤手
探丸竟日中三輔從來多盜賊令人長憶尹扶風聞道
南徐戰壘寒長河濁浪急風湍妖星北去方鳴矢社火
東來又揭竿燕市少年屠狗業楚人故技沐猴冠賈生

痛哭長沙遠獨坐寒林策治安黃沙白草野茫茫落日
行人恐大梁烽火一時連薊北軍書千里震淮揚總戎
殊錫恩尤重小醜專城勢劇狂禁旅如雲須急戰不應
持守費儲糧皆是時作善乎香東侍郎之言曰林清一
鄉里無賴耳驅黨數十人輒思逞志於禁門之內而安
坐指揮捕之如縛豚犬李文成見滑城旣圍挾其悍賊
西竄遏以偏師一戰而就燬滅馮克善往來糾結無有
應者變名亡命逮以一卒迨凶渠旣殄餘孽負嵎大兵
進克聚而殲旃前後不及三月羣賊悉除正如蜂蠆螫
人殺之誠不舉手然竟令其白晝犯闕三郡連兵吏無

政邏者門者無禁軍無律吏惰卒驕文武並弛而法制
禁令爲虛器則事之可憂豈獨在賊夫政者所以治天
下之具行之以實乃能有功不則文具而已天下州縣
官以千計道府以百計大小將領以萬計其人士豈能
盡識之大臣者所以寄天下之耳目而分其治者也得
人與否大臣實係之明則知人公則不參以私實能以
其人之賢不肖聞於上而進退之如是者置於一省而
一省治置於一旗一營而一旗一營治其跋御製養
心殿記錄乾隆朝孫嘉淦三習一弊疏於冊後欲上
用其說以考諸臣之政因以識諸臣之心其言曰天下

督撫二十人耳內外將軍都統之屬以及提督總兵亦
僅百餘人於此百二十人者慎擇而任之兵民之寄治
安之基實在於此可謂知政本矣當時南厓相國學說
盛行其恭跋御製原教一篇尤剴切言之鍾義文經
敘錄有云文敏筆諫古誼忠肝公孫曲學邊彼狂瀾謂
此

彭文勤注五代史欲補十志有煩王伯申飲我詩以奉
商二首云龍門例荆八書傳漁仲曾誇甘略難五季文
章嗟掃地兩家撰述舊登壇薛史會要僅存典制彌堪寶復
見威儀更可觀擬學劉書能補范憑君助我夜燈寒四

紀繙鈔力頗深貴求得失古人心方知史事鯨味廣不

似詩家獺祭尋君聳雙肩工索解我跨一足尙知音試

披兩代家人傳萬丈金隄蟻穴沈

原注薛史失載周世宗后符氏歐史失載

晉出帝后張氏

其留寄胡印渚長齡劉金門鳳詒阮芸臺元云

少時注意歐陽史七十三年未得成門戶雖然成構架

庭階尙乏細經營飄零莫遣同殘葉飲助終當賴友生

幸有三公舊同志爲予輯業定刊行金門續成彭書都

七十四卷以少宰典學浙江緣事謫戍黑龍江 召還

復編修以曾纂 高宗實錄也

仁宗升遐大臣草遺詔有誤公言之當國白 上改正

其人益大進用而公歸矣其存悔齋集有論杜詩五卷
嘗與顧千里以言語牴牾要其文學非千里所及

劉申受禮部爲南劉相國孫由于舍人召揚子少喜讀
蕃露旣冠纂輯胡母子都春秋條例春秋禮申何難鄭
諸書嘉慶甲子三十初度成春秋釋例三十卷時主東

魯講舍閏六月示諸生云將母常懷去閏思

義山詩欲去閏年留

月懸弧兩度又相催已秋願夏心原壯似卷如流日豈
遲自此揮戈無善術誰爲縮地感生離銀雲櫛櫛瑤宮
使青鳥無憑月落時一月重尋翰墨緣温城絕業得珠
聯窺園未免慙前哲駐景方知絕幾編天遣幽人在空

谷帝爲詞客展華年擬將中壽安吾分半世須教萬古

傳弱冠精妍志不磨每從家法辨沿訛引鍼難起邱明

疾入室先操武庫戈

此書體例亦仿當陽故云

要使日星輝覆益還

將峽石挽積波經神絕業如相待一瓣心香奉董何姬

孔風流尙在茲才疏焉敢抗顏師譚經暫宿扶風帳識

面期窺董子帷金石至今聞擲地靈光何處覓殘碑當

春桃李花如繡三十登壇祇自嗤申受嘗就茗柯先生

問易禮從舅氏珍藝盡傳莊氏之學而凌雲詞賦揖讓

班揚復洞究倚聲源流撰八代文苑及詞雅敘錄均見

集中其秋海棠寄洪稚存丈于伊犁云斷腸雖自當春

看庭院秋深倚畫欄欲向東籬尋伴侶晚香依舊耐霜
寒雲作蘿衣月作房自憐薄命遜春芳明妃環佩無歸
日莫勿殘紅門晚妝古詩如察淵道者忌逆億性日偷
所喻惟利達要道恐不尊篇什不多亦足見其鼂采次
子麟石孝廉承寵好王子安李長吉夏節愍集卒年甫
三十玉熙宮三十二韻云徙倚青蕪苑神游萬歷年仙
妃九子佩姪女五銖錢複道芙蓉啟香車翡翠填流鶯
嬌朔管飛燕貼花鈿稚子名如意佳人字小憐銀屏春
睡穩金合夜盟堅豔舞霓裳曲新翻玉樹篇曼聲中部
伎急響大羅天脈望偏多巧蛾兒漫欲仙妖書危郭令

制挺出張顛俄築溫城第遙頌洛邑田疏星依井藻曉
夢破池蓮草野憂危息宮闈歲月遷潛蚪蟠信邸委鬼
落當筵鐵鳳迎風設銅烏向日鮮重來紅蓼岸再整綠
楊船水調傳吳語雲門拭代弦回波詞宛轉過錦戲蹠
躔不料黃巾熾驚聞赤社湮羽書馳祕殿烽火射甘泉
血漉豬王酒腥流隸子筵藩封魂入醉黼座涕橫漣淡
月侵珠網悲風暗錦鞦琵琶拋曲柄鼗鼓徹旋縣器已
金甌缺碁難玉局全西川渡虓虎北闕葬嬋娟白石迷
精衛紅絲哭杜鵑離宮雲淡沲寶幄氣沈縣漢臘移朝
朔秦灰沒古阡穹標長樂燼墮瓦未央鐫此日飛龍牧

當時畫雉眠惟留池畔水石瀨響濺濺其幽雋不減劉

酹甫

申受歲暮懷人雜詩當今著作才暉也乃絕唱泝源薄
騷雅短詠彌清暢謂陽湖周伯恬儀暉故岐山令深於
詩嘗客授廣州當道爭相引重一無所干歸裝惟積詩
盈冊道過南昌訪宋于廷于廷贈詩有贏得詩篇說壯
游之句子騰虎能以文世其家

嘉慶庚申辛酉間李申耆年三十餘鄉試連黜志學彌
篤作詩貽江陰祝子常有曰賈傅始弱冠終軍亦妙年
吾今已過之偃蹇行自憐非怨遇合遲吾學實未全散

館一等七名選安徽鳳臺書坐堂皇理案牘夜與故人
渡江來者契濶談讌賦詩論文集壽州自明以來詩人
爲小山嗣音主講暨陽集江陰人詩爲江干香草刊同
郡詩人遺稿爲舊言集又刻有襄平德公宣西澗遺稿
惜未之見暨陽書院抱經學士舊講席也嘗作輩學齋
雜植花木爲文記之自乾隆丙子至是閱四十年重葺
是齋日聚弟子講誦其中者二十年治經術通音均習
訓詁訂輿圖攷天官歷術及成學治古文辭者輩出蔣
彤述平日所聞仿宋人語錄爲暨陽問答二卷又記其
言動爲先師小德錄

南燼紀聞迎春土牛有淚痕是年汴京破宋于廷詩弔
詭稱泥馬悲涼獨土牛

吳三桂敗後其圖書半歸通海縣闕氏闕禎兆者康熙
閒處士有大漁集版存秀山寺見于廷贈闕吾三文學
自省詩注

永甯阿土司女淑蓮句云春風吹到芳菲歇留得櫻桃
自在紅

孫鳳卿觀察彤家涿州北門內丁字口校刊緯書于廷
作勘經室校緯歌贈之云十一經多後師說二千年斷
絲竹聲篇中赤綠徧奇字遂使鄙別來淆并僞文名姓

造新室內學禁令嚴東京況有章句習口耳微言竟以
荒唐輕圖書九六悉蕪穢大路四達同榛荆 國初以
來重經學先求叔重尋康成古文破壁已推闡祕書殘
檢誰支撐要知禮堂昔寫定獨抱緯學爲孤鳴明堂丙
已義最絕命歷去就傳尤精士禮雖缺據補綴尙書差
備消紛爭此數大端皆可信凡所證合詞分明後儒同
命宗鄭氏頗聞諸說多變更迷途隘塞意早亂閉房駭
怪名同驚試看正論誰復及廣座一一相推評孫炎好
古邁流俗能傳鄭業譏諸卿墜文博采亦矻矻細字徧
校良硜硜非常之義在篇策古書不滅須縱橫聖人欲

說言未顯明者善讀義自生不然周禮盡經法姦人一
用安爲傾何令讖緯遽微滅拘學無乃由張衡勘經室
內一時話異書旣獲歡生平停車爲爾陳此曲躑躅其
足千秋情又涿州追悼孫鳳卿云八廚海內從君數昔
過名州輒暫停座上雄談今寂寞篋中誌緯舊零星衰
門李燮終難問歧路楊朱晚怕經丁字街頭行迹在可
憐宿草幾青青時大名崔述有東壁遺書通潞雷宗彝
孝廉罇有古經服緯子瞻叔大台學淇有校訂竹書紀
年皆北方學者也

兗郡南樓爲杜子美趨庭之地嘉慶丙辰孫淵如爲族

妹與吳山尊成昏於使署妹貧隨父流轉至都幾爲貴
人筮淵如收養之擇才士許嫁焉南樓卻扇圖詩所謂
不是相攸溫嶠才可憐幾似韓憑婦也山尊以己未入
翰林大考高等遷官與幸翰林院和聖製詩三十二人
之列戊辰扈蹕木蘭徧觀園場嘗謂平生游歷所見紅
葉以木蘭哨門爲第一塞山壁立霜葉似綠牆而下干
尋萬片如荼如火已已以養歸居揚州最久別墅曰達
園詩文均該博入古少受詞術於表兄汪存南乙亥六
十初度汪劍潭觴之湖上調一萼紅爲壽山尊就一調
爲之百闕成百萼紅一卷其仿宋刻韓非子最精

姚秋農朱玉存主丁卯山東鄉試得文登舉以田畢故
與淵如舊交經學無雙久困場屋秋農以對策賞拔之
淵如時權藩主鹿鳴之宴作賓興得士圖有句云一聲
堂上都傾耳莫省裴頭與黃尾孤寒平地竟飛騰聞呼
畢卓眞名士舉初名以珣鄉薦後又改名亨字恬溪愛
卽墨勞山九水之幽勝因號九水從東原游其學主于
闡許以通鄭尤長于書淵如彙梓所纂叢書凡九水所
乙改悉仍之不易一字孫子敘錄一卷九水所撰也桂
未谷說文解字義證引其說至數十百事道光丙戌大
挑一等分發江西署安義補崇義卒官楊致堂爲刻雜

文二卷其答友人書云大教言杜詩有來如雷霆收震
怒之句以爲收字誤當作扶此甚當蓋扶字俗不經用
又與收字形相近世俗傳刻譌作收爾而不知出于揚
雲羽獵賦師古云言所扶擊如鬼神雷電也又承示史
記司馬相如贊以爲雄字誤當作憚則不盡然雄傳云
雄顧嘗好詞賦先是蜀有司馬相如作賦甚宏麗溫雅
雄心壯之每作賦常擬之以爲式以故孝成帝時客有
薦雄文似相如者逮其後深悔作賦之不足以風靡麗
多而風諫少于是詆議相如去而作元則贊所云靡麗
之賦勸一風百者固信知其爲雄言非他人語也然其

所以竄于史記蓋亦有故漢書司馬相如贊首言司馬
遷稱云云與史記文正同下無采著于篇句固之作史
多依于遷故首稱司馬遷言而意不主于司馬氏故又
稱揚雄言蓋一褒之一貶之也所謂揚雄以爲者與前
司馬遷言反正適相應學者但知史漢文相出入遂據
此以增彼旣合史記之言屈彊不可通而班氏褒譏之
旨亦復隱而不見何其謬也

巖鐵橋題呂海珊所畫董若雨漏霜苕帚遺像云風雨
河山劫後灰小菴豐草破書堆祇應淨掃興亡恨安穩
蒲團入定來寄星嶠云蜀道青天萬里行棧花峽草聽

猿聲鄉心寄與峨眉雪應作春流過石城均有深婉之
致其敘楊秋室詩錄云吳興之作者胡朏明禹貢錐指
鄭芷畦行水金鑑沈東甫新舊唐書合鈔及徐方虎沈
操堂我家石樵海珊詩集爲最著同時樸學之士丁小
雅爲大戴禮之學姚秋農爲說文之學施非熊爲金史
之學楊傳九爲明史之學小雅有子能讀父書傳九無
子高弟子陳抱之收拾遺稿得詩百數十首傳九之詩
初數義山後服膺竹垞晚年略仿樊榭又敘周鐵瓢詩
稿云山人名農藏鐵瓢二人稱周鐵瓢山人稿余用丹
筆圈出百五十許首五言如落葉云野徑無人跡長天

一雁鳴紅橋夜泛云天下三分月揚州第幾橋七言如
酬於松坪云游絲忽墮壞闌曲柳絮亂堆枯硯池絕句
如得老母書云書中屬付無他語兒早歸來勝得官看
牡丹云闌干閑煞無人倚誰肯來看未放時後世有目
者當知之鐵橋能詩故其論詩亦復中冓至其雜詩云
黃河天上落如龍性難馴自從開關來爲害中國頻徙
之行塞外中外長不貧主漢武時齊人延年之言謂今
中外一家倘由東勝沂喀喇木倫河鑿溝吳喇忒至毛
明安出喀爾喀右部放河東下我于左翼前旗之東爲
四五堰不使涓滴南流則漠南數千里漸成膏腴中土

小無河患豈非萬年至計未免河漢無極然河工修築
歲糜金錢以經費有常之款而飽貪猾官吏之侵蝕俾
之極意奢淫以壞風氣其流弊固可深喟也

彭文勤於嘉慶二年爲光山胡滄曉宗伯補撰墓誌謂
王文公爲知常州李餘慶誌墓在旣葬之二十三年蘇
文忠之祖序葬以慶歷八年越熙甯元年請曾南豐爲
之誌上距葬時二十年王止仲謂誌石埋墓前數尺固
無妨幽宅禮有改題神主之文神主可改題誌石亦可
補納也宗伯以奏河南振荒事田敏肅被切責敏肅旋
劾宗伯長子孟基本邱姓子不當冒官卷中式舉人坐

是罷歸乾隆元年詔復原官三十七年子季堂以所著
周易函書約注進呈五十九年追賜易名之典孫淵如
和胡雲坡宮保師紀恩元韻云九家撰述揚先志乙部
收羅契 帝情楹內納書齊相去殿中曳履鄭公行論
邀文矣千秋定謚取良哉一字榮自是甘盤勞記注戴
恩追孝感交榮文良與修周易折中卜筮精蘊雍正八
年嘗在尙書房行走也孫鈺朴齋與淵如同年進士
道光九年程春海居項太夫人憂主鍾山書院時蔣襄
平在江南辛卯春海起復北上王營雇車其過腰站有
感詩云廿年清議一身持四海賢才到耳知叔子去人

眞遠甚房公食鮓最淒其爍金安用羣兒謗投杼終教
阿母疑讖到白雞諸事了有誰箏響激桓伊此詩當爲
襄平相國作也襄平自嘉慶十四年擢江蘇巡撫調浙
江十六年擢督兩廣二十二年調四川道光二年內召
爲刑部尙書四年以直隸總督入閣五年入直樞垣以
伉直不得久居中七年代琦善督兩江亨衢特進揚歷
中外者二十餘年表裏洞達一意以培植賢才扶持善
類爲念所薦達者多以功名著以人事君之美近時所
無雖亦有徇虛聲敗末路之士然道光中語賢相必首
推公庚寅左遷平原旅殯蓋不能無中於讒慝之口云

程春海博綜經史從凌仲子游及其闔奧詩好温李兼
有昌黎山谷之勝舟過泰和張南山同年邀登快閣歸
飲衙齋別後奉寄云十年睽張侯一笑登快閣渾忘別
甚速且述相見樂出處憂患際耿不廢著作必逢斲聖
質急告不待索長筵爛漫興良夜深淺酌莊語間諧語
思之恍如昨續歡在今日今日日又落下有東逝水上
有西飛鶴海南五色羽縛爲君子筆如何署紙尾祇合
畫雲日不讀城旦書焉知堯舜術君相識其循楚滌撫
忘逸君任黃梅時
辦水災極善小試步文節江月照萬室快閣六百
載魚鳥又聳聒卻願名山藏著書比于櫛高賢羅滿堂

夢寐拜甲乙

君韜國朝詩人徵畧先成六十卷

長年狎驚濤厥舵不在

手卻使制奔馬馬亦馴不走才高百適用慎勿掣其肘
用小不若大用新不若久赫赫未一舉斷斷已眾口毋
被宵小測必照罔兩醜干譽定無譽含垢實濯垢古大
有爲者敝屣視印紐初筵極快意談論出肺肝燭至促
客行沙水舟漫漫一夕償十年求友亦大難狷性眇心
計勢交多面歡況乃道藝契植根天地寬神劒飛合時
重取焦琴彈丙申三月下滌邀陳雪臚先生俞理初黃
香鐵溫雲心孫柳君集棗花寺看牡丹分韻得寺字云
抱罕其頤洛鄆粹江關百變尤殊異竭來一抹姮娥面

偶見海雲紅照地

海雲紅紫牡丹也寺中皆粉紅惟有魏紫一叢

七寶不欄錦

不幙風焦日剝粉題瘁可憐文讌蕭寥甚花亦色羞不

能媚金車塵塏瓦鼓鬧息媯無言玉奴睡不有夢中傳

彩筆誰暎花魂拭花淚雅材博學抗奇古麗句清辭各

名世淵淵浩浩杳難測相對渾如不識字偶然談劇露

鱗爪一映吹來萬夫避漫將何肉惱法喜卻具伊蒲溷

香積有芳奚待正封詠無酒不令陶公醉逃哉貞觀逮

今日幾飾丹霞幾傾墜何況花光草露跡一刹那頃琉

璃器試看諸老牛腰卷更說仙人親手植

謂紅杏青松卷及丁香詩

牌南能文字果持久東海揚塵非所議詞源心印屬五

客走亦籠東驅下駟綠陰啼鳥日轉午紅香叢蝶春已

季祇恐孟夔起蘋末復盼春龍渥芳意時正望雨緒風且訪

芍藥榮後約斯烹善筍概豐臺極樂俱在遠有興仍尋

棗花寺重經白田云金精飛入井維西照見江波不貯

泥壁上干詩張旭草唐書以裴將軍射張旭草與公合傳鏡中雙影莫邪

妻見公詩誰家畫閣新鶯囀料得龍池萬柳齊公龍池聽鶯為始遇

白田聽鶯為不遇辛苦上皇西內去繞枝都是杜鵑啼淮南何

事苦爭先請永王璘罪到申公絕可憐杜少陵有楚筵辭醴之句況是贈

金都斥謝若論仗鉞亦親賢至今江上看明月共道樓

頭有謫仙千古詩魂在盃酒匡山牛渚兩茫然後人辨匡山辨

夜郎皆徒然耳
不足當公一映

兩京雖復未稱雄始信投簪浩蕩胸狂

客揮毫輕國色上公低首拜軍容

謂郭尚父

難堪宋璟巾中

淚卻憶龍標別後鐘是處樓高宜縱酒爲君翦取最奇

峰啼鶯猶是古來聲中有新詩脫口成神劍白連孤月

墮宮袍紅擁萬花行憐才欲殺皆知已蹈海求仙豈近

名只有錦心銷不盡死生終戀謝宣城諸詩皆岸異卓

絕才調縱橫司農嘗自謂吾詩險而不夷能飛揚而不

能黯淡然如憶春云畫裏游絲難捉搦夢中佳句半模

糊誰憐讀易扃扉客看取蕪菁繞砌鋪未嘗不清微淡

遠意味翛然

張文襄謂地理爲史學要領 國朝史學家皆精於此

顧祖禹胡渭齊召南戴震洪亮吉徐松李兆洛張穆尤

爲專門名家春海贈徐星伯前輩詩云指掌河源米聚

山蒲昌蔥嶺屹中間千秋著作天公畀故遣甘英渡玉

關兩賦已傾耶律博先生著新置賦爲千古奇作一編

還證小顏疏漢書西域傳補注誰憐雪海冰山外獨據銀鞍纂

異書小策青驪顧盼奇刀光如雪擁新詩材官伏地先

生笑勒馬天山自打碑先生手拓姜行本紀數載流沙

賦采薇刀環夢繞馬頭飛袖中拈出昆侖影抵得封侯

萬里歸同時壽陽祁鶴皋中允貫弗乙部括史例通國

書在史館奉 旨創立蒙古王公表傳嵇文恭屬公任
其事悉發大庫清字紅本分檢之有涉外藩事跡者擇
要詳譯作低冊按部落條析之人立一傳必以見諸實
錄紅本者爲確復據 皇輿圖西北垂疆域爲綱領據
理藩院世譜訂王公等派系凡八閱寒暑而成計書百
二十卷終始佐公者則郭檢討在遼也及戊伊犁則創
纂伊犁總統事略別摘山川疆理爲西域釋地司農亦
著有戰國策地名考二十卷阮文達謂爲全謝山地理
志稽疑之亞

星伯復於敦煌搜得唐索勳及李氏修功德兩碑皆向來著錄所無者見煦齋協揆

西域水道記跋

春海祭錢東生夫子文云子嘗稱言經生偉人 昭代

所儲薈萃著述錄采梗概以遺南狐學核壇宇治課常
變鈇析而臚子又稱言文蔽也雜詩蔽也誣和易其體
篤雅其節黼繡其祛圭陰江左謝華啟秀鎔一鞠蘊欲
剽橫流自守宗派以還古初東生一字金粟以翰林起
家大考一等歷官學士臨終豫剋亡日經畫含斂以詩
三百篇詒高麗申侍郎以寫定詩三十卷詒春海以所
集名臣儒林文苑事實九冊詒汪孟慈喜荀卽王菽原
所刻文獻徵存錄也詩如貝多水云竹瘦蟲書字蕉肥
鹿喫花過太和縣云溪魚茁連母山鳥喚功曹孔壠驛

夜不寐云涼換風牀笛秋生水閣鐙雨後行劍州道中
云竹多求路礙雲重度溪難答人問近狀云睡早常妨
夜疴縣獨喜秋斑竹垞上晚步云蕉深圍野屋蔗熟卧
溪田發淇縣云叢薄人自語茅檐雞下飛懷員外別墅
云魚聚都歸寨鵬馴不置籠朱八兄新居成云庭移都
尉棘圃熟相公瓜昨夢云舊吟經月改殘夢入秋圓題
錢詹事大昕與人論經義手札云今書稱女子古易重
將軍西齋雜興云塵封裴氏學冰噤郗公談人情松肉
脯秋思菊苗齏雨來云林芳新嘒蕊壤滑嫩澆蔬皆自
出機杼清介可風其六言句云學道每緣疾損著書不

愛人知可以想其風采

王菽原謂錢東生體弱多病不喜酬應日常過午不食每夙興在丑寅之交率燒高燭一二枝閱書數十番天始明無閒寒暑集中有地憐新掃後窗愛小明時及倚枕休驚蟻充庖並斷蚶之句可證其說至冥閒決事之語存而不論可耳

錢東生以戊辰入翰林散館授職者二十九人一紀未逾八人卽世成絕句八首分輓之賦得黃花若散金玉樓天半望沈沈夜來誰作秋墳唱羅剎江頭恨共深

會稽

張編

深秋只記分張日絡繹添愁菊墮籬百軸新詩藏

得否扶牀含淚有文姬海昌陳編每披新事助文華架

有奇書坐客誇塵夢暫醒雲過眼一編龍舉屬誰家閩縣

王檢討道行昏昏沈麴放春眠冷落車斜二十篇淚盡一聲

金捍撥鞋貧散水聽年年武進劉編修嗣緒姓名空自

署丹臺偃骨纔披急化灰至竟成仙須學佛四禪天上

少三災饒編修絢春風疾奄奄伏枕身門前收債雁行

人紅綃一裹勞君寄療病何嘗肯療貧貴陽夏侍僧海

帆高壓浪低薊門山折馬頻嘶若為更化單飛鶴霧毒

鷺沈下五谿臨桂朱編修榮出守南鄰舊是吾吟伴寸

步毋教走覓妨臥柳一枝啼不住春來嬾過斛斯莊定遠

官侍
讀煥

嗣綰字醕甫號芙初爲劉文恪元孫法梧門序尙

綱堂集謂其鼓篋橋門與莫寶齋齒相若才相亞寶齋

擢上第衡文四方而醕甫以相門子青衫彳亍於隘巷

菰蘆低首下心三黜於有司而後遇禮闈舉首朝野慶

得人於時年四十餘矣會疾書字不能工未與鼎甲選

入翰林重宿望也郭頻伽謂其居京師落落寡合門庭

蕭寂其性情益與東生相似詩文博麗晚益清澹不獨

老去填詞如聞水樂年六十以毀卒東生又有哭謝侍

講同年句云楹鑿嬰留語篇分陸奏書謝名階樹著有

約書又嘗上書言事凡萬餘言宜黃人顧南雅戊辰分

校所取士

郭頻伽落解南歸梧門時爲祭酒以句贈行云一輩登科慙李邵半年太學去何蕃夏玉延頻伽壻也壬午造榜日吳蘭雪招客棗花寺二十四客集者纔十四人既而稍稍引去惟蘭雪首唱一詩雪樵和之玉年受笙各作一畫定菴填一萼紅詞玉延次韻想見長安聽榜情

味

吳枚菴藏書多手鈔精本嘗舉詩社於支硎與釋寒石唱酬尤密其題畫扇贈吳槎客云泱泱泉流漾淺沙深山雨過落松花閒來偶踐山僧約留得先春願渚茶詞

亦明秀所輯懷舊集印須集孤寒憔悴之士多藉以傳
黃蕘圃耽書好古潘文勤師蒐輯其藏書題跋聚而刻
之所藏汪水雲詩有潘次耕跋考宋後宮隨瀛國公歸
元事甚悉跋云汪水雲詩元明人並相推許有詩史之
目其詠宋幼主降元後事皆得之目擊多史傳所未載
而聲情悽婉悲歌當泣故君故國之思斯須不忘可以
愧食祿之臣矣虞山錢氏跋其詩摘二絕句云第二筵
開八九重君王把酒勸三宮醅酥割罷行酥酪又進椒
盤割嫩蔥客中忽忽又重陽滿酌蒲萄當菊觴謝后已
叨新聖旨謝家田土免輸糧又引挽謝后詩云事去干

年速愁來一死遲乃云合而觀之紫蓋入洛青衣行酒
豈足痛哉讀畢不覺流涕及紙一如有深恥而不言者
是大不然考之宋史理宗謝后寶慶三年冊立垂四十
年而度宗嗣位尊爲皇太后又十年而幼主立尊爲太
皇太后已老病不能聽政德祐二年宋亡北徙越七年
而終壽七十四則至燕時已六十七矣元世祖崩於元
三十一年壽八十滅宋在十三年壽已六十二甯有劉
曜羊后之嫌所云謝家田土免輸糧者當是以謝后舉
國納降之故優恤其宗耳豈有他哉其歷敘燕會之豐
自皇帝初開第一筵至第十瓊筵敝紫宸凡十章據云

君王把酒后妃進卮三宮坐受極其隆禮且屢云宴罷
歸來未嘗暫留元宮也始至而十開筵宴猶以客禮待
之乃加封爵給第宅賚錦綺免后家之稅授降臣之官
見於諸詩歷歷有序不當篋取二章深致感慨也元人
以宋爲大國不意其君臣不戰迎降喜慰過望故不戮
一人而遇母后幼君有加禮於此見世祖之寬厚水雲
又詠宋宮人分嫁北匠云君王不重色安肯留金闈則
世祖爲人可知矣元史又稱宏吉刺后之賢見宋幼主
入朝而不樂視宋府庫物一無取又爲宋全太后不習
水土代奏乞回江南帝不許退而厚待之則知禮數優

渥復有賢后之助焉大抵旣封幼主爲瀛國公則必別
置邸第母子宮眷仍當聚在其中觀水雲詩云昭儀別
館香雲暖手把詩書授國公則王昭儀亦未嘗入元宮
也令其爲元妃嬪安得與水雲時相唱酬哉至謝太后
歿而後全后爲尼瀛國作講師悉見於集若不詳考本
末而獨摘新旨免糧二語殊足動後人深疑德祐之事
已是千古至辱余不忍三朝國母重遭污讒且使水雲
有遺累也故詳辨之松陵潘耒識昔周世祖保全元氏
分布庶職隋遷周鼎宇文之後靡有子遺帝王盛事卻
特其猶庶幾乎

施非熊爲南溥老諸生不利舉業究心於金源一代事
跡積數十年著有金史詳校遺山詩文箋其自題金源
劄記云閒消我有肆簾風寓墨金源舊事叢野史功臣
慙褚補圭齋諍友悔劉通書鈔冷局讐難徧字訂譌傳
擬未工長此一編深篋底敢言載筆附羣公自謂與錢
詹事攷異有不合處非敢立異本無事于操戈不欲苟
同或難逃于撼樹平心論之但求公是其考世宗大定
二十八年禁糠禪瓢禪云此習至蒙古始盛耶律楚材
湛然居士集西游錄序西域九十六種北方毘盧糠瓢
白經香會之徒釋氏之邪也張昱輦下曲肩垂綠髮事

康禪淡掃蛾眉自可憐出入內門妝飾盛滿宮爭逐女
神仙嘉慶丁丑嘗過黃蕘圃家小住五日與談金元史
事如瓶瀉水無一停留爲跋歸潛志云夏六月過復翁
家相知十餘年始識面也翁以余喜說金源事因出此
舊鈔原校與鮑刻略同惟歸潛堂記之銅壺此作銅臺
向閱鮑本壺字不解曾擬改作鞮字今見此臺字乃知
舊本之足貴至太宗神射之爲太祖神功李純甫卒於
元光末王仲見爲王廣道猶子良由神川誤記不必校
北研謹識沈子愔嘗從問業亦熟於遼金元掌故及西
北邊地里

納刺文恭公玉麟爲笠民督糧孫嘉慶己巳視學江蘇
時陽湖董子詵太守方立孝廉年少有雋才按試常州
取入府縣學各冠其曹方立辭賦瑰瑋更肆力於律歷
數理輿地名物之學卒年三十三蘭石詞爲方立遺書
之九南浦送方彥聞之廣西云鶯肥燕老便東風無計
繫離魂野水平翻綠漲孤棹拂行雲酒盡青山斜日又
蕭蕭急雨近黃昏算蘋花飄漾柳花輕薄誰與話殘春
碧海桂江萬里繞天涯煙絮正紛紛故國鵲紅已盡休
誤仞啼痕今夜月明華屋只相思斷夢付蓬根望楚鄉
消息勤將芳草寄玉孫彥聞一字朮民工駢體文與陸

祁孫攻詩古體宗六朝近體出入於大歷十子嗜金石
文字游伊闕時得唐以前造像題名多至八百餘種謂
六朝民罹鋒鏑苦惑釋氏說思種福田以求生全其情
可憫觀之可以識世變誠篤論也

武威張介侯續田山蘊爲黔書李芝齡宗伯有黔記吳
仲雲尙書復錄所聞見爲黔語二卷記甘忠果及王忠
毅之鼎授命事爲作二忠詩皆漢軍人也甲秀樓在南
明河南岸樓額爲裴中丞宗錫書樓前鐵柱二其形圓
長十尺有奇一稍殺下無趺上有蓋六面皆鑄字西林
鄂公宜軒勒公平苗紀功也臞翁鐵柱篇云一柱鑄自

雍正年重臣定策開黔邊古州八萬古化外上下九股
相鉤連殿頭鑄印督三省危厓大箐驅戈鋌紛紛獮薶
置郡縣荒芻驚視中原天一柱干支紀嘉慶叢爾南籠
苗逆命文臣縮朒久養癰妖巫煽誘苗人聽王師嘽嘽
自楚來小醜跳梁更戡定八月十五覆賊巢刀光月光
交相映屹然兩柱銘厥功細論難易未必同要知 三
聖布神化早看魑結成華風磨風轟雨鍊花裂天陰鬼
語聞嗚咽似云此鐵非是鐵乃是千人萬人血鑄爲錢
鑄力可任官吏擾農愁苦深靡威所被羣苗服我願鑄
爲良吏心頗似樂天程春海題其選詩圖云人誇浙派

君不膺人訾浙派君不憑破除門戶還風雅知君是有
心秤者謂仲雲所續乃祖退菴杭郡詩輯也自作亦可
知矣

泰菴尙書和瑛

初名和甯

額爾德特氏嘉慶二年任駐藏大

臣作西藏賦一卷凡佛教寺廟官制風俗物產地界考
核綦詳審魏默深聖武記作於道光猶誤以雅魯藏布
江爲金沙江源此書於山川探源析委並圖經之舛亦
爲正明雖中閒以三藏爲三危爲東天竺不累其大體
也在西域著有三州紀略以道光元年卒諡簡勤平生
湛深經術尤邃於易嘗著讀易滙參一書閒事吟詠文

采爛然集曰易簡堂詩鈔子內大臣勤襄公壁昌起家
縣令洊擢監司三出峪關經營西域守孤城知兵最深
旋鎮八閩開府江左著書三種曰兵武聞見錄葉爾羌
守邊紀要牧令要訣孫直隸總督恆福侍講謙福曾孫
席卿冢宰錫珍韋卿兵備錫佩家世貴顯居東城方家
胡同伯熙祭酒月川制府壻也嘗言書樓庋簡勤手纂
稿本盈箱累架蓋其撰著之未刊行者多矣

戊辰一榜如周稚圭陶鳧薌錢衍石均耽風雅金梁夢
月詞工力爲深其繡幃金鴨熏香坐說與春寒總不知
頗有歐陽永叔庭院深深樓高不見之意

陸祁孫與兄子劭聞齊名時稱二陸論文詆王暢甫謂姚惜抱譽之爲大過而論詩不薄沈歸愚吳穀人所著合肥學舍札記稱心而言老輩談藝語亦多見其中周介存晉略爲一生志事所萃嘗言方今天下善讀書者首武進李申耆善書者首安吳包慎伯於詩稱陶杜然痛詆謝康樂而以亭林詩爲少陵後一人

孫平叔詩文溫雅其憂時李令心如日忍事裴公鬢有霜集中佳句也官浙閩時兩度臺陽奠安反側或議其行事微近乎刻僚屬小有過差彈劾不稍寬故二子均無後李愛伯先生深斥其說謂文靖善政有利于民者

多矣何至因劾一二不肖之吏遂隕其世天道固有不
可知者自來除一貪酷吏卽爲種福于民斷無以劾官
致天怒者也

震澤趙良甫樂潛堂詩寒柳句云樓頭只挂青天月塞
上還思碧玉年爲時所稱余所藏飛鴻閣琴意爲戈順
卿手搃本謂眞文庚青侵尋三部通用此沿學宋齋之
誤也質陌與月屑截然兩部門外漢每誤用之良甫何
亦效尤鴿字在合洽部質陌月屑之外又有合洽一部
此淺於韻學者不及知也疏於詞學者亦不能知之屋
沃覺藥通用更是出人意外魚語部亦不能與歌哿通

玉漏遲換頭句法乃上二下四如夢窗夜久繡段藏嬌
是也此作折腰句誤揚州慢底事句當上一下四如白
石之盡齊麥青青是也西子妝慢首句夢窗作流水麴
塵麴字似以入作平然宜從之用入聲字爲妥畔字宜
韻夢窗作觀盟誤乃用韻也我亦投閒住夢窗作又趁
寒食去食字與上麴字同亦字宜去聲閒字宜入聲順
卿謹於聲律所指摘處剖及豪芒艮甫蕉萃胥疏舊游
如汪紫珊袁蘭村袁湘灑劉芙初先後歸道山刻此詞
時且垂垂老矣就正之餘順卿痛下箴砭固是直諒之

友

友
突
向
空
因
賦
一
二
不
肖
之
徒
敢
謂
其
知
天
誰
因
再
不

袁湘灤徵君名棠吳江人工詩善繪事有句云新水和
愁連夜漲晚花含蕊待春深可謂工于言情其尊人樸
村先生景輅嘗從沈文慤學詩守師說與同志者陳易
門毓升芝房毓咸顧蔚雲汝敬東巖我魯王北溪元文
暨從兄竹軒益之日相切劘爲詩所爲竹溪七子社也
後進稱詩者必推本於竹溪詩社以明宗派湘灤少孤
比長與朱春生師事蔚雲受詩法湘灤續竹溪社鄭瘦
山孝廉與焉孝廉名璜著有春秋地理今釋

雪橋詩話卷十